

又

修行休向法中求著法尋求不自由認取自家心是佛何須向外
外苦週遊靈源慧照塵休昧應物般般意莫留兩道清風開玉
戶一條銀燧出山頭

自詠

從初割愛做修持守一清貧志不移竹笠羊皮常作伴破羶膈
袋每相隨肥羊細酒全無愛淡飯殘羹且療飢木碗乞錢新置
得衲袂猶是出家時

暢道

雲水遨遊物外仙刀圭一粒斷塵緣真空結就三田寶妙用圓

道藏輯要

水雲集

七
胃集五

成五葉蓮火滅煙消因鍛鍊心清意靜爲精專逍遙放蕩長眞
子萬里飄飄般若船

又

雲水逍遙逐處家任他烏兔易年華閑中慧水添金鼎靜裏靈
田種玉芽海底養成紅芍藥山頭結就白蓮花我今說破超塵
寶本有如如卽大砂

又

雲水逍遙物外仙閑閑靜靜本來天存心滅我開金鎖損意志
情折玉蓮彼岸岸頭搜密妙靈山山裏得良緣丹成九轉清風
送解纜飄飄般若船